

欽定四庫全書

子部

薛氏醫案卷七十七



詳校官太醫院吏目臣吳尊變

編修臣倉聖脈覆勘

薛氏醫案卷之六

小兒痘疹
薛氏醫案卷之六

明 薛己 訂

最為重病何則瘡疹之
示不惟無益抑又害之
之由父母愛子急於救
不致夭橫者文中每思

及此惻然於心因取家藏已驗之方集為一卷名之
曰小兒痘疹方論刻梓流布以廣古人活幼之意顧
不遑歟

和安郎判太醫局兼翰林良醫陳文中謹書

論痘疹受病之由

夫小兒在胎之時乃母五臟之液所養成形也其母不知
禁戒縱情厚味好啖辛酸或食毒物其氣傳於胞胎之
中此毒發為瘡疹名曰三穢液毒○一五臟六腑穢液

之毒發為水泡瘡○二皮膜筋肉穢液之毒發為膿水
泡瘡○三氣血骨髓穢液之毒發為膿血水泡瘡三毒
既出發為疹痘瘡也子母俱忌食葱韭薤蒜醋酒鹽醬
獐兔鷄犬魚腥等物世俗未曉將為發舉往往不顧其
後誤傷者多矣

論痘疹治法

凡小兒瘡疹未出已出之間有類傷寒之狀憎寒壯熱
身體疼痛大便黃稠此正病也若無他疾不必服藥

愚按痘疹若小兒首尾平和自有勿藥之喜蓋其腸胃軟弱易為虛實故必不得已折其太過益其不足可也

凡療瘡疹先分表裏虛實如表裏俱實者其瘡易出易靨表裏俱虛者反是表實裏虛者其瘡易出難靨表虛裏實者亦反是若始出一日至十日渾身壯熱大便黃稠乃表裏俱實其瘡必光澤起發滿肥且易靨也

愚按治痘疹之法與癰疽無異若邪氣在裏而實熱

者用前胡枳殼散元氣怯而虛熱者用參芪四聖散
虛弱者用紫草木香湯虛寒者用參芪內托散虛寒
內脫者用木香散若邪氣在表而實熱者用麻黃甘
葛湯此要法也餘見各症

凡瘡疹已出未出之間或瀉渴或腹脹或氣促謂之裡
虛急用十一味木香散治之

愚按經云真氣奪則虛邪氣勝則實實謂邪氣實而
真氣虛也然倒靨瀉渴等症若喜熱飲食手足並冷

或不食嘔吐者是為陽氣虛寒也用辛熱之劑補之
喜冷飲食手足不冷或唇舌黑裂者陽氣實熱也用
苦寒之劑瀉之

凡瘡疹已出未愈之間不光澤不起發不紅活謂之表
虛急用十二味異功散治之

愚按張翼之云吐瀉少食為裡虛陷伏倒靨灰白為
表虛二者俱見為表裡俱虛用異功散救之甚至薑
附靈砂亦可用若止裡虛減官桂止表虛減肉苳蔻

若能食便閉而陷伏倒靨者為裡實輕用射干鼠粘
子湯重用前胡枳殼散下利吐瀉能食為裡實若用
實裡則結癰毒紅活定凸為表實若用補表則潰爛
不結痂凡痘一見斑點便忌葛根湯恐發得表裡也
凡痘瘡已出未愈之間不光澤不起發不紅活或腹脹
或瀉渴或氣促謂之表裡俱虛急用十二味異功散送
七味肉苳蔻丸治之

愚按前症審係表裡虛寒急用前法緩則不救○一

小兒出痘不起發紅活腹脹瀉渴皆以為不治施院使為表裡虛寒用十二味異功散一劑即起發紅活諸症頓退又用參芪內托散貫膿而靨○儒者薛戒甫子五歲出痘三四日下紫血十數滴至八日不止而瘡不起御醫錢春林謂脾氣虛寒用木香散二劑用丁香十一粒人參五錢一日服之次日痘皆起而有膿由是血漸止二十餘日而愈○一小兒起發紅活但不時作痒口乾作渴便血面赤發熱先君謂腸

胃有熱先用濟生犀角地黃湯加柴胡一劑諸症漸退形體倦怠此邪氣去而形氣虛弱耳用四君子湯加當歸黃芪紅花二劑而安○一小兒痘瘡赤痛煩熱作渴或便血或衄血先君用犀角地黃湯而血愈又用紫草快癍湯加黃芪芍藥而愈後瘡痕色白用四君歸芪治之而痊○一小兒出痘吐血其痘赤痛如錐或瘡出血余謂肝火熾盛用小柴胡湯加生地一劑隨用濟生犀角地黃湯一劑頓愈又用芹菜

汁而痊。○一小兒痘瘡下血而不起發先君謂氣血不足用紫草快癍湯加參芪歸朮治之血止瘡起但貫膿遲緩用八珍湯倍加參芪數劑瘡靨而根白痒此氣血虛而熱也用八珍湯二十餘劑而愈。○一小兒痘疹大便下血小便甚赤瘡顆色赤發熱飲冷先君謂熱毒鬱滯先用八正散一劑後用解毒防風湯一劑頓愈又飲芹菜汁而全痊。○一小兒痘正發而便血倦怠少食作渴飲湯余謂倦怠便血此脾虛而不

能攝血也少食作渴此脾虛而津液短少也用五味異功散加升麻紫草治之而愈○一小兒便血腹脹困倦發熱口乾飲湯四肢逆冷先君以為脾氣虛寒不能攝血用五味異功散加丁香十粒炮薑五分二劑血止痘貫而靨○一小兒七歲患痘瘡腹脹八九日矣先君云當急補脾主不信仍服消毒之藥忽大便下血甚多而歿○一小兒作渴泄瀉發熱飲冷唇舌皴裂瀉糞穢臭先君以為內熱所作用前胡枳殼

散稍愈又用清涼飲加漏蘆乳母服之兒頓安

凡小兒斑駁疹毒之病俗言疹子是肺胃蘊熱因時氣薰發於外狀如蚊蚤所咬赤則十生一死黑則十死一生大抵遇春而生發至夏而長成乃陽氣薰蒸故得生成者也臟腑調和血氣充實則易出易靨蓋因內無冷氣外常和暖也凡痘疹熱渴切不可與瓜柿蜜水等冷物及清涼飲消毒散等藥恐損脾胃則腹脹喘悶寒戰咬牙而難治蓋咬牙者齒稿也乃血氣不榮不可妄作

熱治

愚按前症若兼吐瀉手足指冷者屬內虛寒而外假熱也急用木香散如不應用異功散若大便不通渴欲飲冷者則前所禁蜜水之類又當用矣但宜審其熱之虛實若屬虛熱者雖欲水拒之而不飲當用人參白朮散熱渴自止屬實熱者自甚索水且喜而飲之當以犀角磨水服諸症即解其後亦無餘毒之患矣北方出痘不拘冬夏若喜冷者再不用藥但與水

飲無有不愈蓋北方地燥而又睡熱炕故也。一婦人患時疫將愈更出痘瘡大起發體倦痛甚則昏憤煩渴飲湯不思食用十全大補湯及朱砂末其痛頓止食進體健仍用前湯倍加參芪十餘劑而貫膿又數劑而愈。一妊婦發熱作渴遍身骨節作痛用仙方活命飲二劑諸症稍愈至十一日出痘百餘顆形氣甚倦用紫草木香散又出少許但口乾作渴用人參白朮散而渴止用八珍湯加丹皮柴胡而貫膿後

去丹皮柴胡倍加參芪數劑而痘靨○一男子年將三十出痘根窠赤痛發熱作渴服紫草飲之類前症益甚痘裂出血余用小柴胡加生地犀角二劑諸症頓減又用聖濟犀角地黄湯而貫膿再用八珍湯而結痂○一小兒煩躁飲冷不止先君用濟生犀角地黄湯頓愈後渴而喜熱又用當歸補血湯而痊惟倦怠少食用七味白朮散而瘥○一小兒患此飲冷不止或痘脹痛先君用濟生犀角地黄湯并芹菜汁而